



ՏԱՐԵԿԱՆ ՏԵՂԵԿԱԳԻՐ
ԵՐՈՒՍԱՂԵՄԻ ՀԱՅՈՑ Ս. ԹԱՐԳՄԱՆՉԱՅ ԵՐԿՐՈՐԴԱԿԱՆ
ՎԱՐԺԱՐԱՆԻ
(1981—1982)

1982 թվականի հունիսի 6-ին, վարժարանի ամսվերջի հանդիսության ժամանակ, Սրբոց Թարգմանչաց երկրորդական վարժարանի տեսուչ Ս. Կյուրեղ եպիսկոպոս Գաբրիելյանը ներկայացրել է վարժարանի տարեկան տեղեկագիրը:

Ամսվերջի հանդիսությանը նախագահել է Երուսաղեմի հայոց ամենապատիվ Ս. Եղիշե Սրբազան Պատրիարքը:

Այս տարի վարժարանը ունեցել է 180 երկսեռ աշակերտություն՝ բաժանված երկրորդական, նախակրթական և մանկապարտեզ բաժիններում:

Երկրորդական վարժարանում՝ 20 մանչ, 32 աղջիկ.

Նախակրթականում՝ 37 մանչ և 40 աղջիկ. Մանկապարտեզում՝ 31 մանչ և 20 աղջիկ:

Տեսչական տեղեկագիրը չկպբից վշտով արձանագրում է. որ «սոտ տասնյակ աշակերտներ իրենց ընտանիքներուն հետ արտագաղթեցին դեպի Ամերիկա և Ավստրալիա: Կըսենք ասիկա ցավ ի սիրտ, որովհետև արտագաղթը դարձած է այլևս ցավալի երևույթ Երուսաղեմի հայ գաղութի համար:

Միջազգային նշանակությամբ այս քաղաքին մեջ պետք ունինք թվով և որակով կշիռք ունեցող համայնք մը»:

Այս ուսումնական տարում Ս. Թարգմանչաց վարժարանում մեծ նվիրումով ու սիրով պաշտոնավարել են 28 հայ և օտար երկսեռ ուսուցիչներ, որոնցից 5-ը եղել են Ս. Հակոբյանց միաբանության անդամներ:

Ուսումնական ծրագրում տեղ են գտել հա-

յերեն (աշխարհաբար ու գրաբար), անգլերեն, արաբերեն, եբրայեցերեն լեզուների ուսուցումը, մաթեմատիկա, գիտություն, սպորտություն, հայագիտական առարկաներ, հայ գրականություն, կրոն, քրիստոնեական, Հայ Եկեղեցու և ժողովրդի, Հին և Նոր Կտակարանների պատմություն: Ուսուցման համար գործնական հիմնական լեզուները եղել են հայերենն ու արաբերենը՝ նախակրթարանի բաժնում, իսկ հայերենն ու անգլերենը՝ երկրորդական վարժարանում:

Այս տարի երկրորդական վարժարանից շրջանավարտ են եղել 16 աշակերտներ, որոնցից 6-ը շարունակելու են իրենց ուսումը բարձրագույն դպրոցներում:

Հայաստանի պետական համալսարանում սովորելու են երեք շրջանավարտներ, իսկ երկու ուսանողներ՝ Հայաստանի արհեստագործական տեխնիկումում:

Այժմ Հայաստանի պետական համալսարանում սովորում են Ս. Թարգմանչաց վարժարանի 14 շրջանավարտ աշակերտներ:

Ս. Թարգմանչաց երկրորդական վարժարանում լուրջ աշխատանք է տարվում աշակերտության հոգևոր դաստիարակության ուղղությամբ, կրոնական, եկեղեցագիտական մի շարք առարկաների սխտեմատիկ դասավանդությամբ:

Դպրոցի աշակերտությունը ամեն կիրակի և տոնական օրերին ներկա է լինում սուրբ պատարագներին, մասնակցում է եկեղեցական արարողություններին ու տաղավարի օրերին սուրբ Հաղորդություն է ստանում:

Վարժարանում բարձր մակարդակի վրա է գտնվում նաև ֆիզկուլտուրայի դասավանդությունը, «առողջ միտք առողջ մարմնի մեջ» դասական մտածումով:

Ուսումնա-դաստիարակչական ու հոգևոր-բարոյական տեղեկագրին կցվել է նաև վարժարանի «Տարեկան ելից ու մտից հաշվեկշիռը»:

Վարժարանի տեսչական տեղեկագիրը խորին շնորհակալություն և երախտագիտություն է հայտնում դպրոցի այն բարերարներին ու կազմակերպություններին, որոնք ի մասնավորի նվիրատվություն են կատարել վարժարանի առաջընթացի և ուսումնա-դաստիարակչական ծրագրերի բարվոք կատարման համար, «որոնք անսալով մեր սրբ-տագին կոչերուն, իրենց վաստակեն բաժին մը հանեցին նաև մեր կրթական գործին, որոնք մինչև հիմա եղան ապնիվ աշխատակիցները այս համապգային, կրթական, հոգևոր, բարոյական ձեռնարկին, բերին իրենց սիրտն ու գուրգուրանքը հայ մանուկին, ապագա հայ սերունդներին և այսու հանդիսացան մեկ տարվան մեր նվաճումներուն ող-նուկը»:

Տեսչական տեղեկագիրը վերջում «որդիական սեր, երկյուղած հարգանք ու երախտագիտություն» է հայտնում այս տարի ևս Ամենայն Հայոց Հայրապետին, «Որուն հայրական բարեհաճ կարգադրությամբ այս տա-

րի ևս վարժարանս օգտվեցավ Լուդոնի Աբգարյան Ավանդի խնամակալության 500 ստերլինի նվիրատվությունն»:

Տեսչական տեղագիրը ջերմ շնորհակալություն է հայտնում արտասահմանյան հայերի հետ մշակութային կապի կազմակերպությանը, որը «ինչպես նախընթաց տարիներուն, այս տարի ևս, նվիրեց վարժարանին Հայոց լեզվի դասագրքեր, ապգային, գրական, մարպական թերթեր, ընթերցանության գրքեր, և առիթը կուտա մեզի ամեն արձակուրդի առիթով դրկել Երևան ուսուցիչ մը և երկու աշակերտներ հետևելու մանկավարժական դասընթացներուն»:

Տեսչական տեղեկագիրը փակվում է Երուսաղեմի ամենապատիվ Ս. Եղիշե Սրբապան Պատրիարքին ուղղված «ջերմ սիրո, հարգանքի ու շնորհակալության խոսքերով, իբրև պետը Ս. Հակոբյանց միաբանության և Հայ Երուսաղեմին, Սուրբ Թարգմանչաց վարժարանի հանդեպ Անոր ցույց տված հայրական գուրգուրանքին և հոգացության համար»:

Տեսչական տեղեկագիրը փակվում է Ս. Եղիշե Սրբապան Պատրիարքի, վարժարանի բոլոր հարգելի նվիրատուների և անձնվեր գործակիցների, ուսուցչական կազմի արևաշատության և երջանկության սրտագին բարեմաղթություններով:

Արժան և իրավ:

